



**Les Fleurs Des Vies Des Saints Et Des Festes De Toute
L'Annee, Svivant L'Vsage Dv Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromee, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

XIV La vie de S. Fructueux, Archeuesque & Confess.

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

assez la gloire à laquelle nostre Seigneur les referuoit. Apres que ces reliques eurent esté trouuées, on fit vne Eglise souz terre, pour les tenir en lieu conuenable. En fin le Roy Catholique Ferdinád fit bastir là vne Eglise, & vn magnifique Monastere, qu'il donna aux Hieronimites pour y faire le seruice, & augmēter la deuotion de tout le peuple enuers la sainte & les autres Martyrs. Outre tous les Martyrologes qui font mention de sainte Engracie, quelques Breuiaries & Legendes des saints, le Poëte Prudence l'a recommandée par ses vers, & saint Eugene troisieme archeuesque de Toledé, predecesseur immediat de S. Ildefonse, porta vne telle deuotion à ceste sainte vierge, & à ses compagnons, & eut tant de volonté de les seruir, comme dit saint Ildefonse, qu'estant le premier Officier de l'Eglise de Toledé, il quitta tout ce qu'il auoit, & s'alla rendre Moine à Saragoce, en l'Eglise de sainte Engracie, où il demeura quelques années, iusques à ce qu'il fut fait Archeuesque de Toledé. Dacien ne se contenta pas d'auoir martyrisé la noble vierge, & les 18. Cheualiers de Iesus-Christ: au contraire voyant la constance des Chrestiens de ceste grande ville, qui ne les pouuoit fleschir, ny amolir, il resolut de les exterminer tout d'un coup. A ceste fin il fit publier que tous les Chrestiens eussent à vider la ville en vn tel iour, & emporter leurs commoditez pour aller viure ailleurs par les villages. Si tost qu'ils furent sortis, il fit fermer les portes de la ville, de peur qu'ils n'y rentrassent, puis tailler le reste en pieces par ses gens de guerre, qui firent vn tel carnage d'hommes & de femmes, de grands & petits, qu'à faute de les auoir peu nombrez, on les appelle les innombrables Martyrs de Saragoce: & de peur que les cors saints de ces bien-heureux Martyrs ne fussent honorez, il les fit brusler avec des corps de mal-faictors, qui auoient esté executez par iustice. Mais que peut l'inuention humaine ou l'astuce diabolique contre la protection diuine? Les cendres des saints martyrs se separerent miraculeusement des autres, & s'assemblerent en des boules blanches: à ceste occasion surnommee la Messe blanche (comme il arriua aussi à trois cens Martyrs d'Affrique, executez le mesme iour que S. Cyprien, desquels l'Eglise fait mention le 24. Aoust) Les Chrestiens les recueillirent, & les porterent en la mesme Eglise de sainte Engracie, qui pour ce sujet s'appella aussi l'Eglise des saintes Messes. Il est fait mention de ces innombrables Martyrs dans les Martyrologes Romain & d'Vsuard, le 6. de Nouembre, & le Poëte Prudence les celebre, & S. Isidore dit que la ville de Saragoce est la plus illustre d'Espagne, à cause du tresor inestimable des Reliques & corps saints dont elle est garnie.

Qui ne reconnoistra au martyre de sainte Engracie & des autres, dont nous auôs parlé, la toute puissance de Dieu, la lascheté de l'homme, & la vaine cruauté de Sathan, qui poussa Dacien à tourmenter si horriblement vne ieune fille, & à esteindre le seruice du vray Dieu: mais le Diable demeura mocqué, & Dacien confus: la vierge

trionpha, Dieu fut glorifié, & sa sainte Religion dilatée par tout, & la ville de Saragoce arrobée des trophées de tant de glorieux Martyrs qui la decorent, l'enrichissent, & l'asseurent contre les assauts de tous leurs ennemis, tant spirituels que temporels.

LA VIE DE SAINT FRUCTUEUX,
Archeuesque de Burgos, & Confesseur.



Saint Fructueux estoit Espagnol de nation, du sang Royal des Gots. Son pere estoit Capitaine general de certains Rois, & auoit plusieurs possessions en la terre de Vierce. Cōme il estoit petit garçon son pere le mena vne fois avec luy voir ses troupeaux, & il consideroit attentiuement l'assiete de ses champs & les beaux preparatifs pour y bastir vn Monastere, parce que mesme deslors, par inspiration diuine, il se portoit à fuir la vanité du monde, & à suiure la vie parfaite des Religieux. Il le fit bastir depuis près la ville d'Astorque, au petit canton qu'on appelle encore à present le Vierce, ioignant vn lieu anciennement appellé Complurique, & à present Complute. S. Fructueux fit cōstruire ce Monastere de son reuenu, & le dedica aux Martyrs S. Iuste & Pasteur, & le Roy Chindauinde le dota magnifiquement, à cause de la deuotion & honneur qu'il portoit à S. Fructueux, duquel il admiroit la sainteté, & les rares exemples de sa vie. Apres qu'il eut l'habit de Moine, il fut instruit en la Religion par Tonance Euesque de Palence, & Fructueux s'estudia d'vne telle ferueur à la perfectiō (reliant en toutes sortes d'admirables vertus) que plusieurs Moines accouroiet à luy, pour estre endoctrinez d'vn si bon maistre, & conduits par vn si vigilant Pasteur. Tandis que le saint Abbé viuoit en ceste tranquillité, faisant couler de toutes parts la tres-suaue odeur de ses vertus, le diable enuia son repos, incitant vn sien beau-frere à repeter en Iustice les biens que saint Fructueux auoit leguez au Monastere, & les vendiquer, comme estans le propre de sa femme. Du commencement Fructueux pensoit vaincre son beau-frere par douceur & modestie Chrestienne, mais le trouuant auégulé en sa conuouitise, & trop obstiné, il eut recours à Dieu, se prosternant avec ses Religieux en la presence diuine, le supplia humblement de deffendre la verité qu'il scauoit, & d'assister ceste maison qu'il auoit fondée pour l'amour de luy. Nostre Seigneur l'exauça, enuoiant vne subite & griefue maladie à ce fascheux beau-frere, dont il mourut, laissant le saint deliuré de ceste recherche, mais en grand esmoy, du salut de l'ame de son beau-frere.

Il estoit visité de toutes parts de tant de personnes qui auoient oüy parler de sa sainteté, ores qu'il fust ennemy du bruit, & si desireux de la solitude & recollection, qu'il estoit contraint de sortir quelquesfois du Monastere, & s'enfuir au plus profond du desert, en intention d'y mener vne vie solitaire, iusques à ce que ses moines guidez du Ciel, qui l'alloiet chercher, l'eussent trou-

16. AVR. ué. Car il aduint vne fois que ses Moines estans en queste, les corneilles voloient peu à peu devant eux, comme pour leur monstrier le chemin de la montagne, iusqu'à ce qu'ils les eussent conduits où le saint s'estoit caché: alors par leurs larmes & supplications importunes, iointes à ces miracles, ils le persuadoient de retourner au Monastere, & il la laissoit forcer à cela, voyant que c'estoit la volonté de nostre Seigneur, & postposoit les gousts de sa contemplation au travail & à la fatigue de la direction.

D'autant que le premier Monastere n'estoit plus capable d'une telle multitude de Moines, comme il s'y en presentoit tous les iours, saint Fructueux en fonda vn autre près de là, qu'il nomma saint Pierre en vne vallée qui estoit environnée de tous costez de montagnes & de beaux vergers, pleins de fraischeur. Il edifia vn troisieme Monastere en l'Isle de Candie, & le quatrieme en terre ferme à neuf lieux de ceste coste, sans nombrer les leurs qu'il fonda en diuers lieux, tant d'hommes que de femmes. Entre les vierges qui tomberent en sa charge, il y en eut vne fort signalée, nommée Benoitte, laquelle estant fiancée avec vn homme de qualité, & des premiers Officiers du Roy, poussée d'une feruente foy, & du desir de la Religion, elle se coula secrettement hors la maison de ses parens, & se mit en la protection de saint Fructueux, qui la defendit & soutint, si bien qu'elle excella en toute vertu & sainteté.

Saint Fructueux se rendit fort illustre à toute l'Espagne, tant par sa vie & doctrine que par la fondation de tant de Monasteres, & multiplication de plusieurs Moines qui y florirent, & y furent esteuez: entre lesquels disciples de S. Fructueux, il y eut d'excellens Prelats & Euesques, luy mesme fut forcé de l'estre de l'Eglise de Dumie, aupres de la ville de Brage, & depuis de la mesme ville, & Archeuesché de Brage: car au 2. Concile de Toledé, auquel il se trouua vn Archeuesque de Brage, nommé Potamie, estant tombé en certaine fragilité charnelle, il en eut vn tel regret & ressentiment, que luy mesme pleurant à chaudes larmes, confessa son peché aux autres euesques, & en demanda penitence: il fut deposé par le Concile, & on substitua Fructueux en son lieu, pour estre coniointement Archeuesque de Brage, & Euesque de Dumie, & auoit le gouvernement des autres Eglises de Galice, dont il s'acquitta avec tant d'integrité & de ferueur, qu'il ne relascha iamais vn seul point de l'autorité Monastique es ieunes, rigueurs & ceuvres d'humilité, edifiant tousiours de nouveaux Monasteres, & distribuant aux pauvres, & es ceuvres de pieté les biens des Eglises qui estoient souz sa charge, à scauoir de Dumie & de Brage, entre lesquelles il fit bastir vn Monastere où il choisit sa sepulture, Dieu luy ayant reuelé l'heure de sa mort. De maniere qu'estant tombé malade d'une grosse fièvre qui luy continua quelques iours, il dit à ses Chapelains & Religieux, le iour qu'il deuoit mourir. Le terme estant venu, ils pleuroient tous, & fondoient en larmes, de perdre vn pere, vn maistre &

16. AVR. vn pasteur si vtile: luy seul estoit ioyeux: iouissant de l'esperance de la vie eternelle. Il se fit porter à l'Eglise, où il receut ses Sacremens, & ne voulut pas retourner au logis: ains leuant les mains au ciel, sans autre douleur ny agonie, il rendit l'esprit à Dieu le 16. aueil, le mesme iour qu'on celebre sa feste. Il fut inhumé en ce Monastere, qu'on dit porter à present le nom de saint Fructueux, où il y a des Recolez de l'Ordre de saint François. On monstre son tombeau, & vn ossement du saint, & vn peu de son manteau Archiepiscopal, avec lequel il fut enterré: car le corps fut transferé environ 500. ans apres à S. Iacques en Galice, du temps du premier Archeuesque de ceste Eglise, nommé Iacques. Le corps de S. Fructueux est là en vne Chappelle dans la Croix de l'Eglise, du costé où se dit l'Epistre, en vne chaste fort antique, richement elabourée & émaillée, en laquelle font ses precieux ossemens.


Nostre Seigneur opera plusieurs miracles par saint Fructueux, mesme durant sa vie, vne biche poursuiue de près des chiens de chasse, se vint rendre au saint Abbé, lors qu'il s'estoit retiré au desert, & il la preserua de ce peril, dont elle se sentit si obligée (comme si elle eust eu de l'esprit) qu'elle ne le voulut plus quitter, & si elle passoit vn iour sans voir le saint, qui fut allé dehors, ne cessoit de gemir & pleurer à sa mode, iusqu'à ce qu'il fust de retour, & se iettoit à ses pieds, où elle estoit la plus part du temps couchée. Saint Fructueux l'aimoit, la voyant si douce & agreable, ce qui luy donnoit occasion de louer Dieu. Vn mauuais garçon la tua, & Dieu l'en punit par vne maladie, qui le mena iusqu'à l'extremité; alors il demanda pardon au saint, lequel le visita, & luy prenant la main luy rendit la santé du corps, & celle de l'ame, par ses saints conseils & remonstrances.

Il alloit par le desert si mal, qu'il ressembloit à vn esclau. Vn iour il rencôtra parmy les champs vn homme rustique, & grossier d'esprit & de cors, qui pensoit vrayement que ce fust vn esclau, ainsi qu'il paroissoit à son habit, il s'arreste, & comença à crier: Tu es vn esclau, tu as quitté ton maistre, le frappant à coups de baston. Le saint ne se deffendoit point, & luy disoit doucement: Je ne suis point esclau, ny fugitif, mais le laboureur ne laissa pas de frapper sans escouter ce qu'il disoit, iusqu'à ce que nostre Seigneur, en punition de ceste temeraire cruauté, permit que le diable possédast cet homme, & le tourmentast plus rudement qu'il n'auoit affligé le saint: lequel ayât compassion de celuy qui l'auoit outragé, & voulant luy rendre le bien pour le mal, il supplia nostre Seigneur de le deliurer de ce cruel bourreau, & commanda au diable de le laisser en paix, ce qu'il fit.

On raconte aussi, qu'estant en vn batteau sur la riuiere de Seuille, la nuit, les mariniers laisserent leurs rames & s'endormirent; le batteau vagoit sur l'eau, comme s'ils eussent tous ramé: & vne autrefois passant en l'Isle de Candie, il fut surpris d'une horrible tempeste, dont chacun demeura fort estonné. S. Fructueux les cōsola, & appaisa la mer en vn moment par ses prieres, en sorte qu'ils vindrent au port sans danger. Plusieurs Eglises

16. d'Espagne disent l'Office de saint Fructueux, Brage, Euore, Compostele, Dumie & autres. Sa vie se trouue escrete bien au long dans les anciennes Legendes des saints. Le Martyrologe Romain fait mention de luy le 16. Aueil, & le Breuiare, & le dixiesme Concile de Toled. L'Eglise de Segouie a vn autre Fructueux pour patrõ, qu'elle solemnise le 27. Octobre, ainsi que dit le Cardinal Baronius es Annotations du Martyrologe.

LA VIE DE SAINT TORIBIE,
Euesque & Confesseur.

 Aint Toribie Euesque d'Astorque estoit Espagnol, à ce que dit Iean Molá, es additions qu'il a faites au Martyrologe d'Vsuard, natif de Palence, homme saint & docte, tres-zelé de la foy Catholique. L'on tient assurement qu'il alla à Rome, & fit cognoissance avec le Pape S. Leon le Grand, qui remplissoit lors le siege de saint Pierre, & qu'il passa iusques en Hierusalem, pour voir ces saints lieux par deuotion. Il retourna en Espagne, & la trouua fort gastée & infectée de l'heresie de Priscilien, qu'un meschant homme nommé Marc, Egyptien de nation, y auoit quelque temps auparauant apportée, & Priscilian, qui estoit riche Gentil-homme, eloquent, lettré, efficace & vehement, ayant aualé ce venin, l'alloit vomissant par les prouinces, si bien que de laïque & heretique qu'il estoit, il fut fait Euesque par les faueurs & mauuais artifices de ceux de sa secte, & eut assez d'autorité & de malice pour troubler la paix de l'Eglise. Et combien que Priscilian eust esté condamné à mort par l'Empereur Maxime, & l'Arrest executé en sa personne, & que quelques Papes & Docteurs de l'Eglise, mesme les Empereurs eussent fulminé par leurs loix contre les Priscilianistes, neantmoins sa zizanie estoit tellement enracinée & suivie de tant de monde, qu'il eut assez d'affaires à l'extirper & bannir de l'Espagne. A quoy Toribie seruit beaucoup par son grand zele, vigilance & industrie. Car premierement il commença à prescher contre ceste heresie, avec vne ferueur accompagnée d'une science rare: nostre Seigneur le fauorisoit, & confirmoit sa doctrine par des miracles, à la confusion des heretiques. Car preschant vne fois à Palence contre les Priscilianistes, qui mesprisoient & faisoient des opprobres de la parole de Dieu: il monta sur la plus haute colline de la ville, où est à present l'Hermitage de S. Christophle, & de là il demanda à Dieu, les larmes aux yeux, vn chastiment du Ciel cõtre ces malicieux heretiques. Soudain le ruisseau Carion se déborda, & renuerça vne grande partie de la ville. Le saint ne se contentoit pas de prescher & escrire contre ceste heresie, mais ayant visité plusieurs Eglises d'Espagne, & recogneu de ses yeux la perdition des ames, qui procedoit de ceste pestilencieuse heresie, il escriuit à certains Euesques, en toute hu-

16. milité, mais de bon ancre, les resucillant & encourageant à remedier à vne chose de telle importance, & si pernicieuse à l'Eglise de Dieu. Et voyant qu'il n'aduancoit en rien, il eut recours au Pape S. Leon; comme au Iuge & Pasteur souuerain, & luy enuoya par vn de ses Diactres, ce qu'il auoit écrit contre l'heresie de Priscilian, le suppliant (comme Vicair de Iesus-Chr. en terre) d'estindre ce grand feu. Le Pape Leon embrassa tres-volontiers la proposition de Toribie, & le loia hautement en vne longue Epistre, qui est la 99. des siennes, en laquelle il destruit article par article, les erreurs de Priscilian, qui estoient en grand nombre, & fort extrauagans, & manda à Toribie qu'il sollicité les Euesques de diuerses prouinces, d'assembler vn Synode, pour condamner les erreurs de Priscilian, monstrant en cela cõbien il estimoit la sainteté, zele, doctrine, & obeyssance de Toribie. Le Synode fut congregé en vn bourg de Galice, nommé Cenés, auquel Priscilian, & son heresie, furent condamnés, & l'on redigea par escrit vn formulaire de la vraye foy Catholique, lequel renuoyé à Balconie, Prelat, qui estoit superieur des Eglises de Brages, de ce Royaume, obeyssans tous, comme il estoit bien raisonnable, au Pontife Romain. Entr'autres choses, que met S. Toribie en ceste lettre qu'il escriuit aux Euesques, qui auoient fomenté les erreurs de Priscilian, il exaggera fort le preiudice que font les liures apocryphes, que les heretiques publioient pour diuins, & les exhorte fort de les censurer, comme chose tres-preiudiciable & dommageable. C'est chose certaine, qu'entre les soins que doiuent auoir les Gouverneurs des Republiques, principalement les Pasteurs Ecclesiastiques, qui ont le plus notable interest, c'est de proposer abondamment des liures Catholiques, doctes, graues, & vtilites: & defendre non seulement ceux qui viennent de la boutique des heretiques, faux & reprouuez; mais aussi des liures lascifs, legers, & inutiles, qui ne seruent qu'à entretenir le monde, & leur desrober le temps, sans aucun profit.

17. Retournant donc à saint Toribie, tandis qu'il s'employoit à combattre les heretiques par sa vie, par sa doctrine, & par ses escrits, à confirmer les Catholiques en la vraye Foy, à reformer leurs mœurs, & à s'exercer es bonnes ceuures, il acheua heureusement sa vie, & alla iouir de Dieu, nostre Seigneur ayant fait plusieurs miracles par son intercession. Il deceda le iour qu'on celebre sa feste, à sçauoir le 16. Aueil. Quelques Eglises d'Espagne font commemoration de luy, comme celles de Burgos, Palence, Segouie, Siguença, Astorque & autres. Il fut enterré en l'Eglise saint Martin es montagnes de Lieuane, enuiron l'an de nostre Seigneur 460. On monstre son tombeau où est son corps saint, avec plusieurs autres Reliques, qui sont visitées par les pelerins qui vont là en voyage, & on tient par vne tradition certaine que S. Toribie apporta la pluspart de ces Reliques de Hierusalem, & que le surplus luy fut donné par le saint Pape Leon. Les Breuiaries anciens d'Espagne escriuent de saint Toribie, & le Martyrologe Romain le 16. Aueil, & le Cardinal Baronius